

Antologia lirica dla rujeneda nterna

N lunesc de chëst'ena iel stat na sëira de prezentazion de n liber nuef tla sala dla Lia Mostra d'Ert a Urtijëi. Da liejer nce la poejies de Nadia Rungger y Roberta Dapunt

Chësc lunesc, ai 11 de dezëmber, iel stat la prezentazion dl liber »habe bewurzelte Stecklinge–Geografie meiner inneren Sprache« tla sala dla Lia Mostra d'Ert a Urtijëi. I editëures dl liber, che ie uni dat ora de setëmber de chëst ann, ie Raoul Eisele y Lea Menges de Viena. L liber ie na antologia de lirica y tol ite 35 scritëures de generaziuns desfrëntes – l'autëura plu jëuna ie dl 2002, la plu vedla dl 1939 – dl'Austria y nce de Südtirol. Da liejer iel nce poejies dla scritëura Nadia Rungger de Gherdëina y la scritëura badiota Roberta Dapunt. Danter la poejies ite iel nce da abiné fotografies. Chësta fotografies, fates da Lea Menges, mostra la scritëures te lueges a chëles

che ëiles se sënt cunliedes, lueges ulache les à ravises. L liber ie na cumbinazion de poejies, sottrissedes da ert fotografica – danterite iel nce da abiné pruzesc de scritura da pert dla scritëures. La fotografies ie nce states da udëi tla sala dla Lia Mostra d'Ert a Urtijëi. La tematica zentrela dl liber ie la descrizion lirica de cie che suzed tl dedite dla scritëures, si rujeneda nterna. Nscila à nce spiegà Eisele y Menges che l ie na scritura de cie che n sënt, cie che ie nce de nravisà tl'artistes – y chësc ie uni purtà sun papier. Pra la sëira iel stat da scuté su letures da pert de Nadia Rungger y Roberta Dapunt. Tramedoves à tres poejies senzieres, te si stil persunel particular, dat

udleda te chël che les porta dedite. La doi autëures ladines à liet dant poejies te trëi rujenedes: Nadia Rungger à liet per tudësch y gherdëina, Roberta Dapunt per tudësch, badiot y talian. Daldò iel mo stat na ntervista da pert de Eisele y Menges ala scritëures, danter l auter n con' de si pruzes de scritura o de si dezizion te ciuna rujeneda scrì si poejies.

Do na descuscion drët cumplexa y nteressanta, cun l mesun nce dl publich de fé dumandes, iel mo stat la ucajian per jì inant cun cunties y de rujené cun editëures y scritëures.

Julia Lardschneider



Da m.c.: Lea Menges y Raoul Eisele (editëures) pra la ntervista do la letures dla scritëures ladines Nadia Rungger y Roberta Dapunt.